

Evening Dogri (NSD)

19-11-2025

खबरां

1. प्रधानमंत्री नरेन्द्र मोदी होरें आखेआ ऐ जे पिच्छले 11एं बरें दे दरान 100 करोड़ बसनीके गी समाजी सुरक्षा योजनाएं दे दायरे हेठ आहनेआ गेआ ऐ। श्री मोदी होरें आंध्र प्रदेश च श्री सत्य साई बाबा दे शताब्दी बरे आहले समारोहें च हिस्सा लैता।
2. प्रधानमंत्री मोदी होरें कोयम्बटूर च पीएम किसान योजना तैहत माली मदाद आहली 21मीं किश्त जारी कीती।
3. जनता दल युनाइटेड दे प्रमुख नितिश कुमार होर कल बिहार दे मुखमंत्री दे तौर पर संगंध चुक्कडन।
4. देशे दे सेवानिवृत्त न्याऽधीशें ते नौकरशाहें सने प्रमुख नागरिके निर्वाचन आयोग जेही संवैधानिक संस्थाएं दी छवि खराब करने लेई कांग्रेस ते लोकसभा च विपक्ष दे नेता राहुल गांधी हुं'दी निंदेआ करदे होई इक खुल्ली चिट्ठी लिखी ऐ।
5. सर्वोच्च अदालतै बक्ख-बक्ख ट्रिब्यूनल दे सदस्ये दी नियुक्ति, कार्यकाल ते सेवा शर्ते कन्नै जुडे दे 2021 दे ट्रिब्यूनल सुधार कनून दे केई प्रावधान रद्द करी दित्ते न।
6. कैरेबियाई टापु कुराकाओ ने फीफा विश्वकप फुटबॉल लेई क्वालीफाई करने आहला हुनै तगर दा सबने शा निक्का मुख बनियै इतिहास रची दित्ता ऐ।

<><><><><><>

PM-Andhra Pradesh

प्रधानमंत्री नरेन्द्र मोदी होरें अज्ज आंध्र प्रदेश दे श्रीसत्य साई जिले च आध्यात्मिक गुरु श्री सत्य साई बाबा हुं'दे जन्मशताब्दी समारोह च हिस्सा लैता। उंनें पुट्टुपर्थी च साई बाबा हुं'दी महासमाधि पर प्रार्थना कीती ते श्रद्धांजलि अर्पित कीती। श्री मोदी होरें इस मौके पर यादगारी सिक्का ते साई बाबा हुं'दे जीवन, शिक्षण ते आध्यात्मिक विरासत पर डाक टिकट जारी कीता। उंनें प्रदेश च कुडिएं गी माली सुरक्षा कन्नै सशक्त बनाने लेई सुकन्या समृद्धि योजना दा शुभारंभ कीता। एहदे शा पैहले प्रधानमंत्री होरें पुट्टुपर्थी च प्रशांति निलयम च

महा समाधि पर बशेश पूजा अर्चना कीती। उ'नें गोदानम कार्यक्रम च बी हिस्सा लैता ते 4 करसानें गी पारंपरिक सहायता ते कृतज्ञता स्वरूप गऊ दान कीता।



Prime-Minister PM Kisan

प्रधानमंत्री नरेन्द्र मोदी होरें अज्ज तमिलनाडु दे कोयम्बटूर च पीएम किसान योजना दे तैहत 21मीं किशत जारी कीती। देश भरै च 9 करोड़ करसानें दी मदाद लेई 18 ज्हार करोड़ रुपें शा मते दी रकम जारी कीती गई। प्रधानमंत्री होरें कोयम्बटूर च दक्खनी भारती प्राकृतिक खेती सम्मेलन च बी हिस्सा लैता। इस मौके पर श्री नरेन्द्र मोदी होरें आखेआ जे कृशि खेत्तर दा पिच्छले 11एं ब'रें च कायाकल्प होआ ऐ। उ'नें आखेआ जे राष्ट्र कुदरती खेती दे मामले च वैश्विक केंद्र बनी गेआ ऐ ते एहदी जैविक बन्न-सबन्नता नमां आकार धारण करा'रदी ऐ। उ'नें आखेआ जे कृशि खेत्तर दा निर्यात दूना होई गेआ ऐ ते सरकार ने खेती दिएं पद्धतियें गी आधुनिक बनाने दी दिशा च गैहीं पुट्टियां ना। उ'नें आखेआ जे करसान क्रेडिट कार्डें दे राहें करसानें गी 10 लक्ख करोड़ रुपें शा मते दा लाहू हासल होई चुके दा ऐ।



Bihar NDA

जनता दल यूनाइटेड दे अध्यक्ष नीतीश कुमार होरें'गी अज्ज बिहार च राष्ट्री जनतांत्रिक गठबंधन - एनडीए विधायक दल दा नेता चुनेआ गेआ। एहू फैसला पटना च गठबंधन दे 5 भ्याल दलें दे नमें चुने गेदे विधायकें दी सांझी बैठक च लैता गेआ। एनडीए ने हाल च गै संपन्न राज्य विधानसभा चुनाएं च भारी जित्त हासल कीती ही ते 243 सदस्यें आहली विधानसभा च 202 सीटां जित्तियै सत्ता च वापसी कीती ही। एहदे शा पैहले, बीजेपी नेता सम्राट चौधरी होरें'गी पार्टी विधायक दल दा नेता, जिसलै के विजय सिन्हा होरें'गी उपनेता चुनेआ गेआ। जनता दल यूनाइटेड दे नेता नीतीश कुमार कल 10मीं बारी बिहार दे मुखमंत्री दे औहद्धे दी सगंध चुक्कडना। शपथ ग्रहण समारोह पटना दे ऐतिहासिक गांधी मैदान च होग। प्रधानमंत्री नरेन्द्र मोदी ते केई होर गणमान्य व्यक्ति इस कार्यक्रम च शामिल होडना।



e-passport

केन्द्र सरकार, उन्नत पासपोर्ट सेवा कार्यक्रम दे दुए चरण दे तैहत बरे 2035 तगर ई-पासपोर्ट पूरी चाल्ली कन्नै लागू करने पर कम्म करा'रदी ऐ। एहदे तैहत सबबे नमें जारी पासपोर्ट फौरी तौर पर ई-पासपोर्ट बनी जाडन, जदके मजूदा गैर-इलेक्ट्रॉनिक पासपोर्ट अपनी समें सीमा मुक्कने तगर वैध रौहडन। बदेश मंत्रालय ने दस्सेआ ऐ जे ई-पासपोर्ट भलेआं अज्जै-कल्लै दिएं सुरक्षा सुविधाएं कन्नै लैस न ते इंदे च चिप दा बी इस्तेमाल कीता गेआ ऐ, जेह्डी धोखाधड़ी दी शेंका घट्ट करने च मदाद करग। उ'नें आखेआ जे मंत्रालय ने हुनै तगर घरेलू स्तर पर तकरीबन 80 लक्ख ई-पासपोर्ट ते बदेश च भारती मिशनें दे राहें 60 ज्हार शा मते ई-पासपोर्ट जारी कीते न।

<><><><><><>

Citizens Open Letter

देशे दे सेवानिवृत्त न्याऽधीशें ते नौकरशाहें सने प्रमुख नागरिकें निर्वाचन आयोग ज्नेही संवैधानिक संस्थाएं दी छवि खराब करने लेई कांग्रेस ते लोकसभा च विपक्ष दे नेता राहुल गांधी हुं'दी निंदेआ करदे होई इक खुल्ली चिट्ठी लिक्खी ऐ। इस चिट्ठी पर 272 गणमान्य लोकें दे दस्तख्त न, जिं'दे च 16 न्याऽधीश ते 14 राजदूतें सने 123 सेवानिवृत्त नौकरशाह ते सशस्त्र बलें दे 133 सेवानिवृत्त अधिकारी न। इस चिट्ठी च आखेआ गेआ ऐ जे देशे दे नागरिकें गी पूरी मजबूती ते संकल्प दे कन्नै निर्वाचन आयोग दे कन्नै होना चाहिद। समाज गी एहू मंग रक्खनी चाहिदी जे राजनीतिक नेता महत्वपूर्ण संस्थाएं पर बेबुनियाद आरोप लाना बंद करन।

<><><><><><>

NIA Anmol Bishnoi

गैंगस्टर अनमोल बिश्रोई गी अमरीका थमां प्रत्यर्पित कीते जाने दे बाद अज्ज भारत वापस आहन्नेआ गेआ। गैंगस्टर लॉरेंस बिश्रोई दे भ्राहू ते नेडमे सैह्योगी अनमोल बिश्रोई गी राष्ट्री जांच एजेंसी - एनआईए ने गिरफ्तार कीता हा। एनआईए ने दस्सेआ जे अमरीका च रौहने आहला अनमोल बिश्रोई 2022 थमां फरार हा। ओहू जेल च बंद अपने भ्राहू लॉरेंस बिश्रोई दी अगुवाई आहले आतंकवादी गिरोह च शामिल होने दे आरोप च गिरफ्तार कीता गेदा 19मां आरोपी ऐ। एजेंसी ने दस्सेआ जे अनमोल दे खलाफ एनआईए ने मार्च 2023 च आरोपपत्र दाखल कीता हा। एनआईए ने आखेआ जे बिश्रोई गिरोह दे बक्ख-बक्ख सैह्योगियें दे कन्नै मिलियै कम्म करदे होई अनमोल अमरीका थमां लॉरेंस बिश्रोई गिरोह लेई आतंकी

सिंडिकेट चलांदा रेहा ते आतंकी गतिविधियें गी अंजाम दिं'दा रेहा, ते एह्दे लेई ज़मीनी स्तर पर अपने गुर्गे दा इस्तेमाल करदा रेहा।



Nagaland Hornbill Festival

नागालैंड ने हॉर्नबिल महोत्सव-2025 लेई स्विट्जरलैंड ते आयरलैंड गी भागीदार देश दे तौर पर चुनेआ ऐ। इ'नें दौनें देशें गी चुने जाने दी घोशणा कल नमीं दिल्ली च कीती गई। नागालैंड दे मुखमंत्री नेफ्यू रियो हुं'दी स्विट्जरलैंड दिएं राजदूत माया तिस्साफी हुं'दे कन्नै होई दी बैठक च एहू फैसला लैता गेआ। स्विट्जरलैंड दी राजदूत होरें मेद बुज्झी ऐ जे एह्दे'नै दौनें मुखें बश्कार मजबूत सांस्कृतिक सरबंधें ते बक्ख-बक्ख खेत्तरें च भविक्ख दे सैह्योग दी बत्त पदरी होग। तोआई, मुखमंत्री रियो होरें आयरलैंड दे राजदूत केविन केली हुं'दे कन्नै बी मलटी कीती ते बड़ी मती प्रतिशठा आह्ले इस महोत्सव लेई आयरलैंड गी इक होर भागीदार देश घोशत कीता। इस मौके उप्पर राजदूत केली होरें आखेआ जे एहू सांझ-भ्याली आयरलैंड ते भारत बश्कार बध्दे सांस्कृतिक ते राजनयिक सरबंधें गी दर्शादी ऐ। एह्दे शा पैह्ले, हॉर्नबिल महोत्सव लेई ब्रिटेन गी बी भ्याल मुख दे तौर पर नामित कीता गेआ।



BIMSTEK

बिम्सटेक युवा राजनयिक सलाना संपर्क कार्यक्रम अज्ज नमीं दिल्ली च स्थित सुषमा स्वराज विदेश सेवा संस्थान च शुरु होआ। बदेश मंत्रालय ने दस्सेआ जे हफ्ता भर चलने आह्ले इस कार्यक्रम च बांग्लादेश, भूटान, म्यांमां, नेपाल ते श्रीलंका दे 14 युवा राजनयिक हिस्सा लै करदे न। एहू पैह्लकदमी बंगाल दी खाड़ी आह्ले खेत्तर च युवा राजनयिकें बश्कार सैह्योग गी मज़बूत करने दे भारत दे जतनें दा हिस्सा ऐ। इस कार्यक्रम दी घोशणा प्रधानमंत्री नरेंद्र मोदी होरें बैंकॉक च 6में बिम्सटेक शिखर सम्मेलन च संस्थागत ते समर्थ निर्माण आह्ले जतनें गी मज़बूत करने आस्तै कीती ही।



International Film Fest

भारत दा 56मां अंतराश्ट्री फिल्म महोत्सव कल्लै थमां गोवा दे पणजी च शुरू होआ करदा ऐ। 81 मुल्ले दिएं 240 फिल्में दे इस शानदार सिनेमाई उत्सव दा आयोजन 28 नवंबर तगर चलगा। साठे संवाददाता ने दस्सेआ ऐ जे इस ब'रे दा फिल्म महोत्सव अपनी पारंपरिक प्रतिष्ठा गी अगगे लेई जंदे होई केई विशिष्ट आयोजनें दा गवाह बनगा।



SC-Tribunal Reforms

सर्वोच्च अदालतै बक्ख-बक्ख ट्रिब्यूनल दे सदस्ये दी नियुक्ति, कार्यकाल ते सेवा शर्ते कन्नै जुडे दे 2021 दे ट्रिब्यूनल सुधार कनून दे केई प्रावधान रद्द करी दित्ते ना। मुख्क न्याऽधीश बी.आर. गवई ते न्याऽमूर्ति के. विनोद चंद्रन हुंदी पीठ ने आखेआ जे एहू प्रावधान केंद्र आसेआ ममूली संशोधनें दे कन्नै परतियै लागू कीते जाई चुके दे ना। पीठ ने आखेआ जे रद्द कीते गेदे प्रावधाने कन्नै शक्ति विभाजन दे सिद्धांते दी उल्लंघना होआ करदी ही। पीठ ने इब्बी आखेआ जे बकाया पेदे मामले दी बधदी गिनतरी कन्नै निब्बड़ना न्याऽपालिका दी इक्कमात्र जिम्मेदारी नेई ऐ, सरकार गी बी जिम्मेदारी ठोआनी चाहिदी।



Jaiswal-Afghanistan

बदेश मंत्रालय दे प्रवक्ता रणधीर जायसवाल होरे अज्ज अफ़ग़ानिस्तान दे उद्योग ते बपार मंत्री अलहाज नूरुद्दीन अज़ीज़ियन हुंदा भारत दी अधिकारिक जात्तरा पर सुआगत कीता। सोशल मीडिया पर इक पोस्ट च, श्री जायसवाल होरे आखेआ जे एहू जात्तरा भारत ते अफ़ग़ानिस्तान बश्कार बपार ते निवेश संबंधे गी अगगे बधाने पर केंद्रित ऐ।



Jaishankar Russia

बदेश मंत्री डॉ. एस. जयशंकर होरे अज्ज मॉस्को च रूस दे पैहले उप-प्रधानमंत्री डेनिस मंटुरोव हुंदे कन्नै मलाटी कीती। सोशल मीडिया पर इक पोस्ट च, डॉ. जयशंकर होरे दस्सेआ जे उ'नें अगले म्हीने नमीं दिल्ली च होने आहले सलाना भारत-रूस नेता शिखर सम्मेलन दिएं तैयारिये दी समीक्षा कीती। डॉ. जयशंकर होरे आखेआ जे उ'नें इस ब'रे अगस्त म्हीने

होई दी अपनी पिच्छली बैठक दे बाद थमां दपक्खी सरबंधें च होई दी प्रगति दा जायजा बी लैता।



Russia Ukraine Attack

यूक्रेन च रूस दे ड्रोन ते मिसाइलें दे जबरदस्त हमले च 10 लोकें दी मौत होई गई ते दर्जनां-बद्धे लोक घाऽल होई गो। एहू हमले रिहायशी इलाकें च होए। टेरनोपिल शैहा दे द'उं अपार्टमेंट इमारतें पर होए दे हमले च बच्चें सने घट्टोघट्ट 37 लोक घाऽल होई गो। राहत दल मलबे च फसे दे लोकें दी तलाश च लग्गे दे ना। यूक्रेन ने दस्सेआ जे रूस ने केई मिसाइलें दे कन्नै हमलावर ते नकली ड्रोन दागे। एहू हमले ऐसे समें च होए जिसलै राष्ट्रपति वोलोदिमीर ज़ेलेंस्की संभावित समझौते दी दिशा च जतनें गी अग्गे बधाने दे मकसद कन्नै गल्लबात लेई तुर्की दी जात्तर पर हे। तोआई, रूस ने आखेआ ऐ जे रोकी गेदी यूक्रेन दी ए.टी.ए.सी.एम.एस. मिसाइलें दा मलबा बोरोनिश च नागरिक थाहें पर डिग्गा ऐ।



Israel Attack

दक्खनी लेबनान च स्थित ऐन अल-हिल्वेह फ़िलिस्तीनी शरणार्थी शिविर पर इक इज़राइली ड्रोन हमले च 13 लोक मारे गे ते केई होर जख्मीं होए ना। लेबनान दी सरकारी राष्ट्री समाचार एजेंसी मूजब, एहू हमला सिडोन दे बाहरले इलाके च इक मसीत दी पार्किंग च खड़ोती दी इक कार पर होआ। तोआई इज़राइली सेना ने आखेआ ऐ जे उन्ने हमास दे इक सिखलाई परिसर गी नशाना बनाया, जेहदा इस्तेमाल कथित तौर पर हमले दी तैयारी लेई कीता गेआ हा। इजरायल ने हमास दे खलाफ अभियान जारी रक्खने दा संकल्प लैता। लेबनान च जारी इज़राइली हमलें मझाटै, एहू हमला पिच्छले ब'रे इज़राइल ते हिज़्बुल्लाह बश्कार होए दे युद्धविराम दे बाद थमां सबनें शा जानलेवा हा।



FIFA

कैरेबियाई द्वीप कुराकाओ ने फीफा विश्वकप फुटबॉल लेई क्वालीफाई करने आह्ला हुनै तगर दा सबनें शा निक्का मुल्ख बनियै इतिहास रची दिता ऐ। किंगस्टन दे नेशनल स्टेडियम च 90 मिनटें तगर चले दा मैच कुराकाओ ते जमैका बश्कार गोल-रैह्त ड्रॉ रेहा, जेहदे परैन्त

तकरीबन डेढ लक्ख दी आबादी आहले कुराकाओ टापु च जश्र दा म्हौल बनी गेआ। कुराकाओ दी टीम 6 मैचें च 12 अंके दे कन्नै गुप-बी च अब्बल थाहै पर रेही।

<><><><><><>

IGP-Poonch

जम्मू जोन दे आई.जी.पी भीम सेन टूटी होरें अज्ज पुंछ जिले दा दौरा लाया जिस दरान उनें इक उच्ची सतह दी बैठक दी अध्यक्षता करदे होई इलाके च पूरे-पराते सुरक्षा हालात, अपराधें दी स्थिति दे कन्नो-कन्नो पुलस ते होरनें सरबंधी तैयारिएं दी बी समीक्षा कीती। बैठक दरान आई.जी.पी होरें जोर देइयै आखेआ कि नियंत्रण रेखा कन्नै लगदे इस संवेदनशील जिले च रमानदारी ते सुरक्षा गी यकीनी बनाने लेई निगरान सरिस्ते गी निग्गर बनाने, इलाके च बर्चस्व बनाने ते सुरक्षा एजेसिएं बश्कार आपूं च नेइमा तालमेल ते सहयोग बनाई रखना बड़ा जरूरी ऐ। उनें आतंकवाद रोधी कारवाइएं, बन्ने पारा चुनौतिएं ते आपात स्थिति दरान कारवाइएं गितै तैयारिएं दा बी जायजा लैता। आई.जी.पी होरें कनून बवस्था बनाए रखने लेई सतर्कता ते पेशेवराना रौऽ अपनाइयै कम्म करने पर बी जोर दित्ता।

<><><><><><>

CM-Kulgam

मुख्यमंत्री उमर अब्दुल्ला होरें अज्ज कुलगाम च जम्मू-कश्मीर क्षेत्रीय बपार मेले दा उद्घाटन कीता जेह्दे च जिले च मिशन युवा तैहत उद्यमता दे क्षेत्र च बदधी लोकप्रियता गी उजागर कीता जा'रदा ऐ। मेले दे मुख् आकर्षण मकामी उपक्रम, उन्दे बजारै तगर पुज्ज ते पंछान ते दिल बधाने आहिलयां केई दिलचस्प ते कामयाबी दियां कहानियां शामिल न जिनेंगी दिक्खियै होरनें नौजवानें गी उद्यमता दे क्षेत्र च अगगे औने दी प्रेरणा हासल होंदी ऐ। इस मौके पर मुख्यमंत्री होरें आखेआ जे पिछले छडे 5एं म्हीने दरान नमें उद्यम लाने सरबंधी 30 ज्हार प्रोजेक्ट रिपोर्टें गी मंजूरी दित्ती गई ऐ ते 9 ज्हार मामलें गी बैंके थमां बी मंजूरी थ्होई गई जिंदे तैहत 400 करोड़ रपे दी रकम युवा उद्यमिएं च उपलब्ध बी कराई दित्ती गई ऐ। उनें आखेआ जे मंजूर मामलें ते बैंके थमां मंजूरी बश्कार बित्थ गी तौले पुरने दी लोड़ ऐ। उनें समूलचे जम्मू-कश्मीर च उद्यमता गी बढ़ावा देने च सरकार दी तरफा सहयोग ते समर्थन देने दे धेइये गी फही पक्का कीता।

<><><><><><>